

纪念华罗庚先生文集序

丘成桐

金坛华氏，百代之英。二纪其逝，思念无已。余习筹学，未逮古人，读先生书，慕情尤笃。洁语析理，闻之心伏。妙文隽语，康庄有道。

清季以还，中土离乱，天下糜沸，书残思缺。宋元算术，谁实继之？

先生起江南，读书清华。浮四海，从哈代，访俄师，游美国。创新求变，会意相得。堆垒素数，复变多元。雅篇艳什，迭互秀出。匹夫挽狂澜于既倒，成一家之言，卓尔出群，斯何人也，其先生乎。

朱弦未绝，空桑可抚。百岁冥辰，士犹仰止。谨集后学之辞，以光先生遗德。